

SECUNDA RHENI

TABULA.



Continet hæc tabula Marcam Badensem, Vuasgoiã, Vuestricham, ditionem principis Palatini, &c. Thermæ Badenses, ubi Marchio ipse residere solet, inuentæ dicuntur tempore Antonini imperatoris, circa annum Christi 126. Otto autem tertius imperator, longe postea erexit circumiacentem regionem in Marcam, additis oppidis aliquot, præcipue Strolhofen & Etlingen, quæ antea fuerunt abbatis Vuissenburgensis. Fridericus uero secundus, cum defecisset comitatus Kreichgoiensis, adiecit Durlacum & Heidelberg, Porro Rastet & Cuppenheim accesserunt ex ditione Eberstein, sicut Phortzen & Cell ex ducatu Sueuico. Nouissime accesserunt regiones Hochberg & Rœtelen.

PALATINATVS.

Fuerunt olim multi & uarij comites Palatini, nempe palatini à Vuittelspach, palatini à Thubingen, palatini à Schiern & palatini à Rheno, quorum omnium successiones iam dudum defecerunt, præter Palatinorum Rhenensium, sed qui & ipsi sepe defecerunt, & hodie quidem nulla nominis eorum extaret memoria, nisi electionis dignitas principatum illum sustinuisset. Primus palatinus comes & elector (eos enim qui fuerunt ante Ottonem tertium hic omittimus) fuit Henricus appellatus, cui successit priuignus eius Sifridus, pater sanctæ Kunegundis. Nam scribunt, quidam, memoratum Henricum uxorem duxisse, relictam principis Brabantini, & filio eius Sifrido tradidisse Palatinatum. Sifridus reliquit duos filios, Ezelinum & Conradum. Qui cum sine hærede decessissent, Henricus dux Saxonie & dux Bavarie, cognominatus superbus, adeptus palatinatum, ob superbiam suam à Friderico primo anno 1180. rursus hac dignitate priuatus est, tradiditque imperator palatinatum fratri suo Cōrado, duci Sueuie, qui et postea anno Christi 1204. sepultus fuit prope Heidelbergum in monasterio Schoenawensi. Hic Conradus reliquit unicam filiam, Agnetem nomine, quam duxit uxorem Henricus dux Saxonie, filius Henrici superbi, factusque est per eam comes Palatinus. Et cum iste Henricus aliam sobolem præter filiam Gertrudem non haberet, translatus fuit per eam palatinatus ad Ottonem ducem Bavarie & comitem à Schiern, cui matrimonialiter fuit iuncta, anno scilicet Christi 1225. Huic successit in utroque principatu filius eius Ludouicus, qui & ipse filium Ludouicum nomine, utriusque principatus hæredem reliquit. Et hic Ludouicus duos habuit filios, Ludouicum, qui ducatum Bavarie retinuit, & Rudolfum, qui partem aliquam in Bavarie cum palatinatu possedit. Et ab eo tempore usque in hodiernum diem Bavarie ducatus sequestratus fuit à palatinatu, tam & si tituli non fuerint discreti. A memorato enim Rudolfo progeniti sunt omnes principes palatini, qui hodie extant. Et licet ipse Rudolfus per fratrem suum Ludouicum imperatorem & ducem Bavarie pulsus fuerit à palatinatu, eo quod suffragium suum in electione non dedisset ei, filij tamen eius ob id non fuerunt spoliati ditione patris, sed successerunt ei Rudolfus & Rupertus, tertius uero Adolfus nomine, licet fuerit secundo natus, cessit tamen post prematuram mortem Rudolphi primogeniti Ruperto, quod is prudentior & regimini aptior esset. Hic Rupertus anno Christi 1346. instituit in Heidelbergensi oppido studium uniuersale. Et cum nec ipse nec Rudolfus prolem masculam relinqueret, factus est post mortem eius princeps elector Rupertus Adolphi fratris filius; qui ducens uxorem

filiam